



Malay



AM > BERITA

Lebih RM13 Bilion Wang Tak Dituntut Direkod Setakat Januari - Akauntan Negara

🕒 07/03/2026 08:13 PM



TANAH MERAH, 7 Mac (Bernama) -- Jabatan Akauntan Negara (JANM) merekodkan lebih RM13 bilion Wang Tak Dituntut (WTD) setakat 31 Januari lepas, kata Akauntan Negara Datuk Zainani Jusoh.

Beliau berkata daripada jumlah itu RM7 bilion masih kekal berada dalam akaun amanah tak dituntut manakala selebihnya pula telah dilaraskan ke dalam akaun hasil disatukan kerana tidak dituntut oleh pemilik atau waris dalam tempoh 10 tahun.

"Namun begitu, wang yang dilaraskan ke dalam akaun hasil disatukan akan dibayar balik sekiranya ada permohonan tuntutan daripada pemilik atau waris," katanya kepada pemberita selepas merasmikan Majlis Pelancaran Kampung Angkat MADANI (KAM) JANM di Kampung Bukit Merah di sini hari ini.



Zainani berkata pihaknya juga tidak pernah melantik mana-mana ejen atau sebagai wakil JANM untuk menuntut wang terbabit bagi pihak penuntut.

"Selain mengadakan aktiviti disetiap program atau karnival anjuran kerajaan, kita juga turut menyediakan sebuah bas bergerak yang akan jelajah ke seluruh negeri untuk memudahkan urusan orang ramai menyemak wang yang tak dituntut," katanya.

Mengulas mengenai KAM di Kampung Bukit Merah, Zainani berkata program ini merupakan kesinambungan projek yang bermula pada 2024 di Nanga Tebat, Lubok Antu, Sarawak dan diikuti pada 2025 di Kampung Minyak Beku, Batu Pahat, Johor.

"Pada 2026, Kampung Bukit Merah di Tanah Merah, Kelantan telah diluluskan sebagai KAM JANM oleh Kementerian Kewangan dan bakal dinaik taraf menerusi peruntukan sebanyak RM500,000.

"Dengan peruntukan yang diluluskan, maka kerja-kerja naik taraf dapat dilaksanakan dengan terancang dan cekap supaya dapat dimanfaatkan sepenuhnya oleh penduduk setempat.

"Antara projek naik taraf kemudahan yang dibincangkan adalah pembaikan kemudahan dan infrastruktur Masjid Al Iktikaf Ibnu Sina, Masjid Iktikaf Pakteh, pembelian kabin untuk pasukan Rukun Tetangga, baik pulih jalan kampung, pembesaran longkang, pemasangan lampu solar jalan dan pembaikan saluran air," katanya.

-- BERNAMA

BERNAMA menyediakan informasi dan berita terkini yang sahih dan komprehensif yang disebarkan melalui Wires BERNAMA; www.bernama.com; BERNAMA TV di saluran Astro 502, unifi TV 631 dan MYTV 121 dan Radio BERNAMA di frekuensi FM93.9 (Lembah Klang), FM107.5 (Johor Bahru), FM107.9 (Kota Kinabalu) dan FM100.9 (Kuching).

Ikuti kami di media sosial :

Facebook : [@bernamaofficial](#), [@bernamatv](#), [@bernamaradio](#)

Twitter : [@bernama.com](#), [@BernamaTV](#), [@bernamaradio](#)

Instagram : [@bernamaofficial](#), [@bernamatvofficial](#),

[@bernamaradioofficial](#)

TikTok : [@bernamaofficial](#)

KATA KUNCI

janm

kam

wtd

akauntan negara

penduduk

BERITA BERKAITAN



Pencawang Baharu Beri Penduduk Kampung Takis Bekalan Elektrik Lebih Stabil – Armizan

🕒 1hari lalu